

康熙東安志

陳寶泉題



東安縣志卷之八

人物志

人物志所記者制誥寵榮名宦鄉賢節孝廉義蓋以德行不同事業亦異要皆建偉烈於當時垂芳聲於後世也寧可缺失弗錄哉噫先賢規範後人儀則若迺觀制誥者當矢忠慕視名宦者當行仁政觀鄉賢者當勵躬行至於矢節敦孝養廉植義端有望於後起之淑人君子志人物

制誥

明

施禮故祖母加贈爲夫人蕭氏

制曰爲君欲其臣盡忠於國則必體其心而從其志肆古聖王有國之通制而
知人情之莫不欲孝親也制推恩之典以申獎勸之意刑部尙書施禮故祖
母贈淑人蕭氏積善垂慶篤生賢孫朕方畀之重任用加贈爲夫人賁命之
榮永慰冥漠

正統四年八月二十八日 贈

加贈爲資政大夫刑部尙書施伯誠

施禮之父

制曰士之仕而能任國重事則推恩必及其親斯固以寵賢者亦嘉其有先德焉爾贈嘉議大夫行在刑部右侍郎施伯誠乃刑部尙書禮之父積善之慶裕於方來致國顯庸在厥賢子積勤誠之已久宜褒榮於所生用加贈爲資政大夫刑部尙書尙克歆承永光幽壤

正統四年八月二十八日 贈

特進階爲資政大夫刑部尙書施禮

制曰朕惟大猷之世慎刑以重民命有虞刑期無刑成周列用中罰時則有若皋陶有若蘇公克諧其美我朝稽古建官邦刑之典尤難其人矧予承嗣大統益崇欽恤嘉與賢良弼予千治咨爾刑部尙書施禮早由科第發身歷事列聖踐更中外所至有聲掌我邦刑克致明允蓋其宅心處已醇厚廉平績用之成簡在朕心今特進爾階爲資政大夫以示褒嘉尙其敬爾由獄以

長邦國惟古之聞人之是式罔俾虞周專美前代欽哉

正統四年八月二十八日 封

施禮之妻封爲宜人馮氏

制曰朕惟人臣之克效勞於國者雖由其父母之德善亦其伉儷相成之有資也故褒榮之命必及之所以厚人倫也爾馮氏大理寺右寺丞施禮之妻以儉勤相其夫俾從夫貴今封爲宜人益勤祇慎服此光榮

洪熙元年正月初五日 封

進階奉直大夫鴻臚寺左少卿施純

制曰國家之設鴻臚所以肅朝儀典僉禮而宣制命於會同者也爲卿左者慎選以任之必得明敏精詳之士庶克稱焉爾鴻臚寺左少卿施純早承父訓繼武賢科進學詞林擢官給事歷年滋久茂著聲稱迨陟今官操履清慎宜錫恩寵以旌爾勞是用進爾階奉直大夫錫之誥命以爲爾榮爾尙益思奮勵益效勞勤期無替於前人庶克臻於顯用爾惟欽哉

成化十三年七月十九日 封

施純妻加贈爲宜人許氏

制曰婦從夫貴不以存沒而異恩蓋重人倫之始以敦風化之本也鴻臚寺左少卿施純妻贈孺人許氏恪敦婦道善相其夫因夫受贈亦已有年夫今進官宜申恤典茲特加贈爲宜人服此寵章永賁泉壤

成化十三年七月十九日 贈

施純繼室加封爲宜人宋氏

制曰有夫則有婦室家之正也故推恩之典婦恆從夫鴻臚寺左少卿施純繼室封孺人宋氏恪恭婦道允宜厥家未能進階爾宜並貴茲特加封爲宜人祇服榮恩毋忘儆戒

成化十三年七月十九日 封

特封爲徵仕郎禮科給事中孫進 孫瑞之父

勅曰教子以忠必使之效勞于國勸臣以孝必爲之致寵于親國典具存彝倫

攸繫爾義官孫進乃禮科給事中瑞之父詩禮傳家丘園養素居鄉尚義已
霑冠服之華教子登庸宜錫絲綸之命用酬教育以勵顯揚茲特封爲徵仕
郎禮科給事中永綏祿養益保壽康

弘治十一年四月十一日 封

孫瑞之母特贈爲孺人徐氏

勅曰子之於母孝愛益極其深君之於臣禮意必從其厚故養有不逮而恩無
弗加爾徐氏乃禮科給事中孫瑞之母閨闔之芳栢樵舊澤篤成令子茂著
時名諫垣之最績方書禮典之褒恩宜錫茲特贈爲孺人庶冥漠之有知服
休光於無斁

弘治十一年四月十一日 贈

孫瑞之繼母特封爲孺人吳氏

勅曰繼母有教育之德不異敏勞朝廷有褒錫之恩實均榮貴茲惟典禮匪自
予私爾吳氏乃禮科給事中孫瑞之繼母夙著閭儀晚成子業雖襁褓之勤

未豫而書史之訓良多茲特封爲孺人服此恩榮益綿壽祉

弘治十一年四月十一日 封

特進階徵仕郎禮科給事中孫瑞

勅曰朕惟六科建署七品分官名應部曹實預盈廷之議職專糾劾亦均治事之勞國體是關公論攸託茲惟清要之地宜居直諒之人爾禮科給事中孫瑞畿邦毓秀甲第登名列職諫垣抗章廷陛部署嚴參駁之體邊儲精按覈之方閱歷浸深賢勞愈著宜加恩典以示褒嘉茲特進爾階徵仕郎錫之勅命於戲論事者必先其大尙存爲國之心持身者貴乎保終勿替守官之節益臻後效以俟登崇欽哉

弘治十一年四月十一日 封

孫瑞之妻特封爲孺人胡氏

勅曰人臣有勞于國朝廷必寵其家肆爲伉儷之良宜及褒封之命典章具在風化所關禮科給事中孫瑞妻胡氏德性柔嘉儀容婉順相夫有道克修饋

祀之儀治內無違不廢詩書之訓爰因夫貴用示國恩茲特封爲孺人祇服寵名益隆闔範

弘治十一年四月十一日 封

特加贈爲資政大夫南京戶部尙書劉旺

體乾之祖

制曰君子積善於家者厚則厥後必昌人臣效忠於國者深則爲報必重故錫上卿之命必加祖考之恩匪徒昭彝典之攸重亦以溯淵源之所自爾贈通議大夫戶部左侍郎劉旺乃南京戶部尙書體乾之祖父安恬有守儉朴無華務本勤生久著克家之譽周貧恤匱素敦好義之風隱鷺楫於一身顯宦徵於再世爲善無不報之理而遲速以時流澤有必及之榮而崇卑以制茲特加贈爾爲資政大夫南京戶部尙書龍章錫寵聿增再世之光犀軸宣綸永作九京之慶

隆慶六年六月初一日 贈

劉體乾之祖母特加贈爲夫人楊氏

制曰追配前人切惟爾祖之念從以孫子良由女士之厘並示褒崇庶彰激勸
爾贈淑人楊氏乃南京戶部尙書劉體乾之祖母惠慈不貳貞靜有儀致發
聞孫踐登顯秩爰邇啟佑之遠實惟善慶之遺茲特加贈爾爲夫人式貽彤
史之輝永示玄扃之耀

隆慶二年六月初一日 贈

贈資政大夫南京兵部尙書劉旺

體乾之祖

制曰朕嗣績洪基思隆孝治推恩錫類固有自親率祖有加無已者所以邇貽
謀之哲而光繩武之孝也爾累贈資政大夫南京兵部尙書體乾之祖父潛
德愼修敦倫禮善休徵濬發奕世彌昌卓有賢孫掌我邦政緬惟慶澤用渙
褒綸茲贈爾資政大夫南京兵部尙書祇歆明命式耀幽扃

萬曆元年三月十三日 贈

劉體乾之祖母累贈夫人楊氏

制曰貽謀啟祚實爲祖功然必有同德之配以成之故食報追榮有偕及之義

厥惟稱哉爾累贈夫人楊氏乃南京兵部尙書劉體乾之祖母靜惠柔嘉閉家有法弘開世祚濬發聞孫允垂奕葉之光益闡重闡之慶宜申錫命永畀蒸嘗茲仍贈爲夫人懿靈有知歆承無歎

萬曆元年三月十三日 贈

特加贈通議大夫戶部左侍郎劉景

體乾之父

制曰士有德重位輕而弗究於用則昌融博大之業必濬發於嗣人國家敷錫之典視其子之秩而崇追之所以示報也爾原任教諭累贈奉政大夫通政使司左參議劉景乃總督倉場督理西苑農事戶部左侍郎體乾之父究心墳典尙友古人振飭規程甄陶多士慶乃詒於哲嗣教益篤於義方卒亢爾宗爲朕卿士茲爾子嘉績登聞特加贈爾通議大夫戶部左侍郎丕昭燕翼之功永襲龍章之賁

隆慶元年三月初三日 贈

劉體乾之嫡母特加贈爲淑人馬氏

制曰家有嫡母是稱嚴君其成子之恩不但與生者等而已朝廷錫命必並及焉所以重風化之本也爾累贈宜人馬氏乃總督倉場督理西苑農事戶部左侍郎劉體乾之嫡母相夫績學茂著靈儀訓子成名克昌家祚邇厥慶源之自宜申茂渥之恩茲特加贈爾爲淑人懿靈不昧尙克歆承

隆慶元年三月初三日 贈

劉體乾之生母特加贈爲淑人高氏

制曰朕惟母以子貴春秋之義朝廷推恩以達愛廣孝以勸忠雖其生母亦所不遺所以寵綏之者至矣爾累封太宜人高氏乃總督倉場督理西苑農事戶部左侍郎劉體乾之生母穆修靈範克嗣徽音篤生聞人爲時碩彥顧忠猷之茂著本慈訓之迪成茲特加贈爾爲淑人豈徒爲幽窆之光亦以慰風木之感

隆慶元年三月初三日 贈

特加贈爲資政大夫南京戶部尙書劉景

體乾之父

制曰臣子效移忠之節恒資父以事君國家敦勸孝之章每因親而教愛厥有經常之典矧當慶賚之期爾累贈通議大夫戶部左侍郎劉景乃南京戶部尙書體乾之父早著文名素端善行筮官學博師模共仰於生徒歸賦閑居庭訓不忘乎詩禮成爾令子作我重臣國計是經克備大臣之節家聲茂振聿增禰廟之光特加贈爾爲資政大夫南京戶部尙書晉顯秩於大僚重恩駢錫慰幽靈於永世餘慶方來

隆慶二年六月初一日 贈

劉體乾之嫡母加贈爲夫人馬氏

制曰子德成於乃父而亦資其母國恩推及所出而必先於尊成憲攸存彝倫斯重爾累贈淑人馬氏乃南京戶部尙書劉體乾之嫡母系出華族笄嬪德門慈淑性生愛子無間於彼已儉勤素守持家克正於始終有子象賢歷敷休聞惟爾慈惠潛厥祥源茲用加贈爾爲夫人賁榮錫於重原表徽音於百世

隆慶二年六月初一日 贈

劉體乾之生母特加贈爲夫人高氏

制曰君恤臣勞恩必及其怙恃母以子貴義實著於春秋爾累贈淑人高氏乃南京戶部尙書劉體乾之生母性和而則德重而莊守含章之貞勵秋霜於晚節享有子之貴悲朝露於先零宜錫顯綸用旌幽履式宣母範以彰子賢茲特加贈爾爲夫人並宣閨闔之光用慰終身之慕

隆慶二年六月初一日 贈

贈資政大夫南京兵部尙書劉景

體乾之父

制曰朕尊奉 慈闈覃敷慶典自子率親戚與顯揚矧司馬重臣奠我南國可無異渥以慰其致孝之心哉爾原任教諭累贈資政大夫南京戶部尙書劉體乾之父明經造士懷德淑身慶洽家庭行孚里閭義方有訓厥嗣奮庸崇躋峻列爾貽穀徵已茲贈爲資政大夫南京兵部尙書欽此龍章益弘燕翼

萬曆元年三月十三日 贈

劉體乾之嫡母贈爲夫人馬氏

制曰人子之有嫡母不惟媿德於父而訓育之恩無異所出國家典制於此每致隆焉非以敦本以崇報哉爾累贈夫人馬氏乃南京兵部尙書劉體乾之嫡母恪修饋政允蹈閨彝順正宜家爰勞勗子顧鼎養方隆而慈範已邈宜申寵命以慰幽靈茲仍贈爲夫人尙克歆承益紓燕裕

萬曆元年三月十三日 贈

劉體乾之生母贈爲夫人高氏

制曰人子之於所生未嘗一日忘報也故仕宦益進則思慕益切思匪申錫何以慰罔極之心耶爾累贈夫人高氏乃南京兵部尙書劉體乾之生母端莊貞靜休有令儀篤生哲人股肱王國方隆鍾鼎之養早遺風木之悲良可悼已茲仍贈爲夫人九原克知良用慰止

萬曆元年三月十三日 贈

授階修職郎行人司行人劉體乾

勅曰國家稽古設行人之官所以尊奉綸音流布中外言動之則係國重輕非甲第之英豈以濫授爾行人司行人劉體乾比以少年連擢高第簡居使職克勵進修俾之將命非特不辱而已茲慶恩用授爾階修職郎錫之勅命爾其益思自樹用懋遠猷朕有顯躋不爾吝也欽哉

嘉靖二十四年八月初二日 封

特贈通議大夫戶部左侍郎劉旺

體乾之祖父

制曰國家寵賚大臣則推恩及其祖考所以報其先世啟佑之功慰其子孫顯揚之志也爾劉旺乃總督倉場督理西苑農事戶部左侍郎體乾之祖父樹德自躬遺安於後儲祥委祉奕世而昌爰有繩武之孫佐朕司徒之政邇求世德宜沛國恩茲特贈爾通議大夫戶部左侍郎庶用慰于九原尚流芳於百世

隆慶元年三月初三日 贈

劉體乾之祖母特贈爲淑人楊氏

制曰易言受介福于王母人孰不有孝享之心哉然必位躋乎列卿而後榮馳乎祖妣顯茲彝典實出殊恩爾楊氏總督倉場督理西苑農事戶部左侍郎劉體乾之祖母行備盛儀德稱母範祥源濬發久而彌彰肆爾聞孫洵登嘉績茲特贈爾爲淑人欽承敷錫之榮益衍克昌之祚

隆慶元年三月初三日 贈

授階資政大夫南京戶部尙書劉體乾

制曰朕祇率典章肇建儲貳惟茲卿士與有分職之勞用沛恩施俾膺休顯之命矧劉都王業所如而地官國計是司可無褒章以示殊眷爾南京戶部尙書劉體乾器識深醇執之以嚴毅才猷敏達措之以周詳舉文學於制科効勞勤於使職載登瑣闥名高七誥之班繼擢銀台望重九官之列佐秋卿而理邦禁貳大農以董京庾歷著忠猷卓有成績乃正司徒之位號俾領舊京之度支而爾蒞事益勤持身彌謹敷陳利病聿清奸蠹之原劑酌盈虛允爲緩急之備睠惟碩德簡在朕心茲以覃恩授爾階資政大夫錫之誥命於戲

八座崇班具瞻攸屬兩都分職厥任惟均尚堅爾心懋宣乃力理茲錢穀期有濟於今時保我邦家務致隆於遠績欽哉

隆慶二年六月初一日 封

劉體乾妻特加爲夫人張氏

制曰臣工效職恒資內助之賢女德作述乃篤相成之義故錄賢勞於國必推寵命於家爾南京戶部尚書劉體乾妻封淑人張氏令儀躬備淑行性成篤孝敬於蘋蘩禋言容於圖史相其夫子著有令名晉樞斗之崇階樹邦家之偉績宜宣我用表爾功茲特加封爾爲夫人祇承優寵之章益謹柔貞之訓
隆慶二年六月初一日 封

特進階徵仕郎吏科右給事中劉體乾

勅曰國家設諫闡之臣以資獻納備僨從而文昌之政皆得以審覆駁正之厥任至重自非達於世務而秉義不渝者朕何賴焉爾吏科右給事中劉體乾精敏足以統要劇明毅足以決是非摠誠陳見而有裨于時摘伏發奸而不